

- सुप्रीम कोर्ट जातिगत जनगणना माथे रोक लगावण रो हुकम देवण री मांग करण वाळी अर्जी खारिज कीनी।
- मुख्यमंत्री भजनलाल शर्मा कह्यो- किसानां ने पाणत सारु पाणी मुहैया करावण सारु सरकार लगातार कोशिश कर रही है।
- जल जीवन मिशन घोटाला मामला मांय ए.सी.बी. री खास अदालत पैली वाळा आई. ए.एस. अहलकार सुबोध अग्रवाल ने पूछताछ सारु पुलिस ने सूप्यो।
- राज्य मांय आंधी-बारिश रूक्या पाछे अब गर्मी रो असर बधबा लाग्यो।

000

सुप्रीम कोर्ट री मुख्य न्यायाधीश न्यायमूर्ति सूर्यकांत, न्यायमूर्ति जॉय माल्या बागची अर न्यायामूर्ति विपुल एम. पंचोली री पीठ जातिगत जनगणना माथे रोक लगावण री मांग करण वाळी अर्जी खारिज कर दीनी है। अर्जी मांय एक बच्चा वाळा पिरवारां ने माली तौर ऊं बधावो देवण ऊं जुड़ी नीतियां बणावण सारु केन्द्र सरकार ने हुकम देवण री मांग ई करी ज्यी ही। ई बीचे जनगणना 2027 रा पहला दौर रा तैत हाल तांई 5 लाख 72 हजार ऊं बत्ता पिरवार खुद गिणती करण रा सुबीता फायदो उठायो है। भारत रा महापंजीयक कह्यो के ओ जनगणना सारु डिजिटल पहल मांय बधती जनभागीदारी ने बतावे है। जनगणना रो पहलो दौर एक अप्रैल ने सारु व्हयो हो। खुद गिणती करण रो सुबीतो 15 अप्रैल तांई मुहैया करायो जावेला। मकानां री लिस्ट बणावण अर गिणती करण रो काम 16 अप्रैल ऊं 15 मई तांई चालेला। आवता साल फरवरी महीना मांय सारु व्हेवण वाळा दूजा दौर मांय जनता री गिणती व्हेला।

000

उपराष्ट्रपति सी.पी. राधाकृष्णन आज नई दिल्ली मांय देश रा संविधान रो सिंधी भाषा संस्करण जारी कीनो। ई मौके वे कह्यो के जद जनता संविधान ने वां री भाषा मांय बांच अर समझ सके, तो राज अर जनता बीचे दूरी कम व्हे जावे है। कार्यक्रम मांय मौजूद कानून मंत्री अर्जुन राम मेघवाल कह्यो के संविधान सगळी भाषावां मांय मुहैया व्हेवण री सूरत मांय जनता इण ने आसानी ऊं बांच र वां रा हक ने समझ सकेला।

000

ध्यानजोग है के साल 1967 मांय आज ही रा दिन सिंधि भाषा ने संविधान री 8वीं अनुसूचि मांय शामिल कर र मान्यता दीरीजी ही। इण री याद मांय हर साल 10 अप्रैल ने सिंधि भाषा दिवस मणायो जावे है। सिंधि भाषा दिवस से मौके अजमेर रा महर्षि दयानन्द सरस्वती विश्वविद्यालय मांय संगोष्ठी राख्यी ज्यी।

000

लोकसभा अध्यक्ष ओम बिरला नौजवानां ने देश री सब ऊं मोटी ताकत बताया है। वे विद्यार्थियां ऊं लोकतंत्र मांय सक्रिय तरीका ऊं भाग लेवण बाबत् कह्यो। श्री बिरला गोवा विश्वविद्यालय मांय राख्यी ज्या एक कार्यक्रम मांय बोल रह्या हा। वे राज मांय महिलावां री बधती भागीदारी रो जिकर करता थकां कह्यो के नारीशक्ति वंदन कानून रो मकसद विधायी निकायां मांय महिलावां री नुमाइंदगी ने मजबूत बणावणो है।

000

आयुष मंत्री प्रताप राव जाधव होम्योपैथी ने करुणा अर प्रमाण माथे आधारित विज्ञान बतायो है। श्री जाधव आज विश्व होम्योपैथी दिवस रे मौके नई दिल्ली मांय राख्यी ज्या कार्यक्रम मांय बोल रह्या हा। श्री जाधव कह्यो के होम्योपैथी री लोकप्रियता बध रही है अर लोग ईलाज रा ई तरीका ने काम ले रह्या है। मंत्री कह्यो के देश रा स्वास्थ्य मॉडल मांय होम्योपैथी लगातार काम आवण वाळी स्वास्थ्य प्रणाली रा तौर ऊं उभर रही है।

000

मुख्यमंत्री भजनलाल शर्मा कह्यो है के किसानों की पहली ज़रूरत पानी है अर वां ने पानी मुहैया करावण सारु सरकार लगातार काम कर रही है। वे आज जयपुर मांय 'ग्लोबल राजस्थान एग्रीटेक मीट (ग्राम)-2026' रा कर्टेन रेज़र कार्यक्रम मांय बोल रह्या हा। मुख्यमंत्री कह्यो के राज्य सरकार हर ज़िला रा किसानों ने दिन मांय बिजली मुहैया करावण की कोशिश कर रही है। श्री शर्मा कह्यो के ग्राम 2026 रा तीन दिन रा कार्यक्रम मांय करीब डोढ़ लाख किसान शामिल व्हेला। मुख्यमंत्री बतायो के ई कार्यक्रम रा प्रचार-प्रसार सारु 15 अप्रैल ऊं आखा राज्य मांय 20 दिन तांई खास प्रचार रथ चलाया जावेला।

000

आज ही जयपुर मांय व्ह्या एक और कार्यक्रम मांय मुख्यमंत्री पुलिस मुख्यालय ऊं महिला सुरक्षा हेल्पलाइन की 42 गाड़ियां ने हरी झंडी बता र रवाना कीनी। महिला सुरक्षा हेल्पलाइन-1090 रा तैत चलायी जावण वाळी अ महिला पीसीआर गाड़ियां प्रदेश मांय महिलावां की हिफाजत अर वां ने मदद देवण की व्यवस्था ने और मजबूत बणावण रा मकसद ऊं चलायी ज्यी है। ई पाछे मुख्यमंत्री पुलिस मुख्यालय मांय पुलिस रा आला अहलकारां सागे मीटिंग कीनी। ई दौरान वे प्रदेश की कानून व्यवस्था अर महिलावां की हिफाजत ऊं जुड़ी न्यारी-न्यारी परियोजनावां रा काम रो जायजो ई लीनो।

000

राज्य मांय लखपति दीदी योजना रे जरिये हाल तांई 16 लाख ऊं बत्ती महिलावां ने फायदो दियो जा चुक्यो है, जदके 'लाडो प्रोत्साहन योजना' रा तैत दी जावण वाळी रकम बधा र अब डोढ़ लाख रुपया कर दीरीजी है। मुख्यमंत्री भजन लाल शर्मा आज जयपुर मांय 'नारी शक्ति वंदन' कार्यक्रम मांय आ जाणकारी दीनी। वे कह्यो के सरकार टाबरियां अर महिलावां की हिफाजत अर बराबरी तैय करण माथे खास ध्यान दे रही है। श्री शर्मा कह्यो के आस वाळी लुगाइयां ने 'मां वाउचर योजना' रे जरिए स्वास्थ्य की मुफ्त जांच रो सुबीतो मुहैया करायो जा रह्यो है अर टाबरियां ने कैसर की बीमारी ऊं बचावण सारु एचपीवी टीका मुफ्त लगावण रो काम ई सरु करी ज्यो है।

000

राजस्थान धरोहर प्रोन्नति प्राधिकरण रा अध्यक्ष ओंकार सिंह लखावत आज डीग ज़िला रा पूंछरी का लोटा हलका मांय चलाया जा रह्या विकास रा कामां रो जायजो लीनो। ई पाछे खबरनवीसां सागे बातचीत करता थकां लखावत कह्यो के ई हलका रा पुरातात्विक अर सांस्कृतिक महत्त्व ने बणायो राखण सारु जरूरी काम कराया जा रह्या है, ज्यां ऊं ई हलका मांय सैर-सपाटा ने बधावो मिलेला।

000

झुन्झुनू ज़िला मांय आज एक बेकाबू ट्रेलर की फेंट मांय आ जावण ऊं तीन जणा की मौत व्हे ग्यी अर तीन जणा घणा ज़ख्मी व्हे ग्या, ज्यां ने ईलाज सारु जयपुर रैफर करी ज्यो है। ओ हादसो तड़के नंगली दीप सिंह गांव मांय एक ट्रेलर रे खेत कने बण्या तंबू मांय बड़ जावण रे कारण व्ह्यो, जठे तम्बू मांय सूता सात जणा इण की फेंट मांय आ ग्या। पुलिस रे मुजब अ लोग मजूरी सारु ई हलका मांय खेत कने ही तंबू लगा र रह रह्या हा।

000

भ्रष्टाचार निरोधक ब्यूरो की खास अदालत जल जीवन मिशन घोटाला मांय आरोपित पैली वाळा आई.ए.एस. अहलकार सुबोध अग्रवाल ने आज 13 अप्रैल तांई पुलिस रिमांड मांय भेज दीनो। ब्यूरो गहरी पूछताछ सारु अदालत ऊं रिमांड मांगी ही, जिण ने अदालत मंजूर कर लीनी। सुबोध अग्रवाल ने काल नई दिल्ली ऊं पकड़ र जयपुर लायी ज्यो हो। ई बीच कृषि मंत्री डॉ. किरोडी लाल मीणा सुबोध अग्रवाल की गिरफ्तारी ने राज्य की मौजूदा सरकार की मोटी कामयाबी बतायी। वे कह्यो के प्रदेश मांय कांग्रेस रा राज मांय वे जल

जीवन मिशन घोटाळा ऊं जुड़ी केई जाणकारियां पेश कीनी ही, ज्यां माथे कोई कार्यवाही नी करीजी।

000

प्रदेश मांय आंधी-बारिश रो सिलसिलो रूक्या पाछे अबे गर्मी रो असर बधबा लाग्यो है। लारला चौबीस घंटां रे दौरान प्रदेश रा घणखर हलकां मांय मौसम साफ रह्यो अर तेज तावड़ा सागे पारो चढ्यो। बाड़मेर मांय राज्य रो सब ऊं बत्तो अधिकतम तापमान साढे 37 डिग्री सेल्सियस दर्ज करी ज्यो। राजधानी जयपुर मांय 30 दशमलव 8 डिग्री सेल्सियस तापमान रह्यो। मौसम केंद्र जयपुर रा निदेशक राधेश्याम शर्मा बतायो के आवता एक सप्ताह मांय प्रदेश रा घणखर हलका मांय मौसम साफ रेहवेला। हालांकि, एक कमजोर विक्रोभ रे कारण आज अर काल बीकानेर संभाग मांय बादळा मंड्या रेहवण रा आसार है। महकमो आवता दो सप्ताह मांय पारो तीन ऊं चार डिग्री सेल्सियस ताई चढबा रा आसार जताया है।

000

सड़क परिवहन अर राजमार्ग मंत्री नितिन गडकरी कह्यो है के निर्माण उद्योग नवाचार अर प्रौद्योगिकी ऊं चालण वाळा उद्योग रा तौर ऊं विकसित व्हे रह्यो है। श्री गडकरी आज नई दिल्ली मांय 17 वां निर्माण उद्योग विकास परिषद विश्वकर्मा पुरस्कार समारोह मांय बोल रह्या हा। गडकरी कह्यो के सरकार रो मकसद देश मांय बणाई-चुणायी री गुणवत्ता मांय सुधार कर र इण रो खर्चो कम करणो है।

000

केंद्रीय संचार ब्यूरो री ओर ऊं आज कोटा मांय पोषण पखवाड़ा रा तैत जागरूकता कार्यक्रम राख्यी ज्यो। कार्यक्रम मांय महिला अर बाल विकास विभाग री उपनिदेशक सीता शर्मा कुपोषण ऊं बचाव सारु महिलावां अर बच्चां कानी ऊं संतुलित पौष्टिक आहार जीमण अर स्वच्छ जीवन शैली अपनावण माथे ज़ोर दीनो। वे आस वाळी महिलावां अर नान्हा टाबर-टाबरियां रा खान-पान मांय हरी तरकारियां अर फल शामिल करण री राय दीनी। कार्यक्रम मांय सवाल-जवाब री होड़ राख र जीतण वाळां ने ईनाम दिया ज्या।

000